

Rapport annual 2017 Biblioteca populara Disentis/Mustér e contuorn

Cun plascher mirein nus anavos sin la laver prestada igl onn vargau. Nus essan perschuididas che la purschida dalla biblioteca contribuescha alla qualitat da viver en vischernaunca e quei dat anim a nus bibliotecaras da buca schar luc cun la laver e cun l'animaziun tier la lectura. Nossa incumbensa ei da porscher a nossa clientella ed a nossas scolas ina purschida da medias attractiva ed actuala e d'amplificar ella cuntuadamein.

Activitads en nossa biblioteca

Era igl onn 2017 han puspei differentas occurrentas giu liug en la biblioteca ed han aschia enrihiu la veta culturala da Mustér e contuorn. Buca il davos ei la biblioteca era in impurtont liug da sentupada per affons da scola, carschi e mummas cun affons pigns.

Cudischs accumpognan nus mintgadi e promovan il svilup digl affon. Aschia lein nus gia animar ils pli pigns tier la lectura ed havein perquei organisau la primavera ed igl atun l'occurrenta da «Buchstart», e quei per affons pigns entochen 3 onns.

L'entschatta digl onn havein nus acquistau in beamer. Cun quel havein nus saviu crear ina nova attracziun per las uras da historias cun Mats, la miur: Il kino da cudischs da maletgs, nua ch'ei vegn raquintau historias cun projectar ils maletgs vid la preit, vegn appreziaus da nos giuvens visitaders.

Igl atun havein nus astgau beneventar las scolettes sco era l'emprema e la secunda classa da Mustér e Tujetsch tier in teater da casperets en biblioteca. L'aventura dil casperet ha procurau per egls tarlischonts tier ils affons.

Ei legra nus zun fetg che la gronda part dallas scolas da Tujetsch, Medel e Mustér e da niev era ina gruppera dalla Casa Depuoz viseten regularmein nossa biblioteca. En quei liug in grond engraziel fetg a scolastas e scolasts per la stimada collaboraziun.

Igl onn passau ha la Pro Juventute Cadi purschiu ensemble cun las bibliotecas dalla Cadi in abonnamenti da famiglia gratuit per las annadas 2012, 2013 e 2014. Las famiglias han fatg stediamein diever da quella purschida, aschia che quella vegn era cuntuada igl onn 2018.

Las duas prelecziuns “Hanna la Tirolra” cun Linard Candreia (schaner 2017) e “Lanz” cul giuven autur Flurin Jecker (settember 2017) cun ragischs romontschas ein stadas interessantas e divertentas ed ein vegnidias frequentadas bein.

La collaboraziun cun Sedrun Mustér Turissem ei vegnida cuntuada, aschia ch'ils hospes da Mustér e Sedrun che possedan ina carta da hospes astgan vinavon selegrar digl access gratuit a nossa biblioteca ed alla biblioteca digitala (www.dibiost.ch).

Duront l'jamna bibliotecara Grischuna (settember 2017) havein nus lantschau la concurrenz «book-selfie». Ils participonts han giu l'incumbensa da far in selfie cun in cudisch. Ord 81 fotografias fetg originalas ha la cumissiun bibliotecara lu eruiu la victura Sabrina Sgier. Ella ha gudignau in squitschader da polaroid mobil.

Naven dalla stad tochen la fin digl onn havein nus astgau beneventar ina praticanta en nies miez. Claudia Foppa Caviezel ei lundervi da reactivar la biblioteca dil gimnasi dalla

clastra da Mustér (GKD) ed ha aschia saviu rimnar experientschas en nossa biblioteca. Nus havein giu plascher ch'ella ei stada ina part da nies team.

Giubileum

Madleina Caminada ha astgau festivar siu giubileum da 30 onns bibliotecara. Paucs onns suenter la fundaziun igl onn 1984 eis ella entrada el survetsch dalla biblioteca. Madleina exequescha la laver cun gronda pissiun ed engaschi, e nus engraziein cordialmein ad ella per la preziosa collaboraziun.

statistica	2017	2016	2015
emprests	12'801	12'254	13'784
novas medias registradas	940	1'024	867
novas entradas	42	51	54
cartas da hospes	35		

Engraziament

Alla fin lein nus engraziar cordialmein a nos gronds e pigns clients. Per lur interess multifar vid la biblioteca, lur marvigliusadad vid nossas novas medias e pils plaids affirmativs, denton era per tips ed inspiraziuns, che nus prendein bugen encunter e che motiveschan adina puspei nus danovamein.

Nus engraziein alla vischernaunca purtadra da Mustér e las vischernauncas vischinontas da Tujetsch, Medel e Sumvitg pil sustegn financial dil menaschi bibliotecar, che vegen la finala adabien a nossa populaziun ed als affons da scola dalla regiun.

Tgi che cala da vuler vegin megliers, cala d'esser buns. Perquei vegin nus vinavon a s'engaschar cun bia plascher ed elan per esser actuals, per porscher in bien survetsch sco era metter nies focus aunc pli ferm sin nossa clientella.

Susanna Venzin

Curaglia/Mustér, fevrier 2018



il selfie che ei ius cun la plema